

րութիւնները, քաղաքն ու նաւահանդիսը: Վրաց զօրքերի մի մասը փախել էր խուճապահար, մի ահադին բազմութիւն էլ մնացել էր գերի:

Յայտնի դարձաւ նոյնպէս, որ թիւրքերին միացել է ամբողջ Աջարիայի և Ախալցխայի մահմետականութիւնը, որ Աբաս-թուփանն էլ գրաւած է թշնամու կողմից:

Այս ամենը չէր նպաստում վրացիների մարտական ոգու յարատեւութեան: Մի անգամ միայն նրանք ունեցան զինւորական յաջողութիւն՝ Չոլուքի մօտ: Բայց այդ փոքրիկ ճակատամարտը պատահական միջադէպ էր: Իրապէս վրացիները նահանջում էին անընդհատ. նրանց մէջ արագ դարդանում էր դասալքութիւնը, քայքայումն ու բարոյալքումը: Պարզ էր, որ վրացի ժողովուրդը չէր ուզում կռուել, թէև թիւրքերն արդէն մտել էին բուն Վրաստանի ներսերը՝ Գուրիան և գրաւել Օդուրզետին: Վրացի գործիչները շատ շուտով հասկացան, որ ժողովուրդը չի հետևում իրենց և շտապեցին փաստից հանել տրամաբանական եզրակացութիւնները:

Դրան նպաստեց և ապր. 3-ին Տրապիզոնից վերադարձած պատերազմութիւնը, մասնաւորապէս Չխենկելին, որը ոգի ի բուն աշխատում էր համոզել իր ընկերներին, որ միակ փրկութիւնը Բրեստ-Լիտովսկի դաշնագիրն ընդունելու, Մնւերկովկասը անկախ յայտարարելու և հաշտութեան բանակցութիւնները վերսկսելու մէջ է: Եւ քանի ճակատի պարտութիւններն աւելանում էին, այնքան մեծանում էր Չխենկելիի կողմնակիցների թիւը:

Վրաց անյաջողութիւնները սուր ցաւ էին պատճառում հայերին, որոնք սարսափով էին դիտում թիւրքերի յառաջխաղացումը: Նրանց ուշադրութիւնը ամբողջապէս բեւեռւած էր Կարսի շրջանում. թշնամին ինքնալստահ քայլերով մօտենում էր Կովկասի անպարտելի ամրութեան: Կարսի անկումը մահ էր հայ ժողովրդի համար, որը, փակւած ծուղակի մէջ, չունէր փրկութեան ո՛չ մի ճանապարհ:

Էրզրումի աղէտը անասելի խուճապ առաջ բերեց հայ ժողովրդի մէջ: Ծայր տւեց դասալքութիւնը, որին ի պատասխան զինւորական մարմինները թիֆլիսում, Ալեքսանդրապոլում և ուրիշ վայրերում կատարեցին մի շարք ահաբեկումներ, որոնք ցնցող սպաւորութիւն արին հասարակութեան վրա: Ազգ. Խորհուրդն էլ, ճառերից ու կոչերից յոգնած, վերջապէս շարժւեց տեղից, և նախադահ Ա. Ահարոնեանը, անդամներ՝ Ս. Մամիկոնեանը, Տ. Բէզգաղեանը, Ն. Աղբալեանը, ինչպէս նաև թիֆլիսի զինւորական մարմինը, անցան ռազմաճակատ: Ազգ. Խորհրդի անդամները այցելեցին Ալեքսանդրապոլ, Կարս, Սարըղամիշ, ամէն տեղ շփում ունեցան զօրքի ու ժողովրդի հետ և իրենց ներկայութեամբ սիրտ տւին ամենքին: Խորհրդակցութիւններ ունեցան բանակի բարձր հրամանատարութեան և հասարակական ներկայացուցիչներին հետ:

Ազգ. Խորհրդի անդամները Սարըղամիշում էին դեռ, երբ սկսեց թիւրքական յարձակումը Կարաուրդանից: Սարըղամիշի անկումից և թիւրքական վերջնագիրը ստացելուց յետոյ, Հ. Յ. Դաշնակցութեան Արևելեան